

Kaarata ya Pawulo yowaalebela aRoma

Madhu oovolowana

Murumiwi Pawulo aalebele kaarata ela aKirixtu yaali nluwa na oRoma, nili elabo ya Italiya. Oononelamo a Bibiliya enoobuwela wi alebile agali oKorintu muyaakani 57 Kirixtu agabaliwe.

Pawulo aalebele aKirixtu aatene a oRoma, aZhudewu ni ale yahaali aZhudewu. Wahikala ohiivanana vaari va makuru meenddi ala. Mwahaya buuyene oliye asuuziheliye dha Malamulo a Mozezi teto ahisuuziha dha Abarhamu ni dha ovulumusiwa wa aZhudewu vamohi ni ale yahaali aZhudewu. Ahisuuziha wi ovulumusiwa onadheela mwa nrromelo baahi. Moone ARoma 1.17. Ahiwoga dha odhivelana mmohi ni mukwaaye ni okala mwa murenddele naari eganna moobuwelelo oohiyana-hiyana.

Pawulo onowoga vajinji dha Malamulo. Kinatoonya dha malamulo kumi; tthabwa-tthabwa onatoonya dha malamulo mazana mannayi a eZhudewu Mulugu yamvahiliye Mozezi oMwaangoni Sinayi.

Ogawanyeya wa kaarata

Madhu owambeela *1.1-17*.

Athu aatene enarabulela ovulumusiwa *1.18 ofiyedha 3.20*.

Ovulumusiwa mwa nrromelo *3.21 ofiyedha 4.25*.

Egumi exa mwa Kirixtu *5.1 ofiyedha 8.39*.

Ezarayeli ni Mulugu *9.1 ofiyedha 11.36*.

Makalelo a egumi ya aKirixtu *12.1 ofiyedha 15.13*.

Muru wa Muselu ola *15.14-33*.

Malojelo oogomihedha *16.1-27*.

Madhu owambeela

1 ¹Wa nyo aKirixtu muli oRoma. Di miyo Pawulo, mwiimeleli a Yesu Kirixtu. Mulugu ohugisakula wi gikale murumiwi,

ogithoma wi galaleye Muselu Wapama waaye. ^a ² Muselu oyo oliye ahiroromeliha wale odheela wa anamavuhulela aaye mMalebani Ootaleleya. ³ Muselu Wapama onawoga dha Mwaanaye. Voowoga dha omuthu wa Mwaana oyo: oliye namabaliwelamo a Davidi, ^b ⁴ vano ohuthwiwa okala Mwaana a Mulugu ni owodha, odheela Muneba Woweela mwa ovenyihiwa waaye muukwani, oyo di Yesu Kirixtu Nabwiya eehu. ⁵ Odheela mwa Kirixtu gihaakela mahala ni mvahi wookala murumiwi wi gaakamihedhege athu a malogo maatene eroromelege, yiiwelelege wi ndina naaye nirihiwege. ^c ⁶ Nyo teto muli vaari va athu owiithaniwa wi mukale a Yesu Kirixtu.

⁷ Ginowuulebelani nyo mwaatene muli oRoma, nyo Mulugu onoodhive-liiyeni teto wuwiithaniliiyeni wi mukale athu aaye ootaleleya.

Mulugu Babiihu ni Nabwiya Yesu Kirixtu yuuvaheni mahala ni murenddele mmirimani mweenyu.

Pawulo onofuna wawoona aKirixtu a oRoma

⁸ Vowambeela, odheela mwa Yesu Kirixtu ginomutthetheela Mulugu aaga mwaha wa nyo mwaatene, vovi elabo yaatene enowoga dha nrromelo neenyu. ⁹ Mulugu ginamweebedhiimi ni muneba waaga waatene voolaleya Muselu Wapama wa Mwaanaye, di namoona aaga wi ginowuwuubuwelelanive mmalobeloni aaga maatene, ¹⁰ gimulobaga Mulugu wi arumeedhela dhiinova gifwanye mpatha woodha wa nyo.

¹¹ Ginorabulela wuwoonani wi guugaweleni mvahi mwa muneba woolibiha dhigumi dheenyu. ¹² Ela sowi vinakaliihu vamohi nilibihanenge. Nyo mugilibihe ni nrromelo neenyu, miyo guulibihagani ni nrromelo naaga. ¹³ Addibilaga, arogoraga, munone wi dila dhijinjidhene gahifuna odha wa nyo, mbwenye ofiyedha dhiinova dhihikala dhinagihiiha. Ginafuna vaari va nyo gidhe gihiddevo mabasa enadhiiha dhoohadda wona mweereliwa vaari va athu amohi a malogo mamohi.

¹⁴ Gihiwaddihedhiwa waalaleyela aatene: AGerego ni ale ehili aGerego, atthotho ni oohunonelamo. ¹⁵ Mwahaya buuyene ginafuneliimi teto wuulaleyelani Muselu Wapama wa nyo muli oRoma.

Kopolo ya Muselu Wapama

¹⁶ Miyo kaginakanna manyazo ni Muselu Wapama, eehi, vovi si kopolo ya Mulugu enaavulumusa athu aatene enaroromela, wambeela aZhudewu, ofiyedha wa aGerego. ¹⁷ Muselu Wapama ola onavuhulela wogoowa wa Mulugu. Wogoowa wula onaakeliwa mwa nrromelo, ona-

^a 1.1 Moone Meerelo a Arumiwi 9.15; 13.2 ^b 1.3 Moone Samuweli a Nabiili 7.12-16; Matewuzhi 1.6 ^c 1.5 Moone Meerelo a Arumiwi 26.16-18

karaateyave munroromeloni baahi. Vowi Maleba yiire: “*Muthu owogoowa onokalanaave egumi odheela mwa nrromelo*”.^d

Owali wa Mulugu mwaha wa dhoothega

¹⁸Vano teto owali wa Mulugu onovuhuleleya odhulu. Onoludduwa mwaha wa dhohogoowa dhaatedhene ni ohumuriha Mulugu wa athu. Odheela mwa dhohogoowa dheewa enopideedha ebaribari. ¹⁹Vowi dhinaandeya wi aliwa enone dha Mulugu dhili dhowooneya vaari va aliwa mwaha wi Mulugu mwiinyeene ohawooneyihedha. ²⁰Vowi okuma omapaddusiwelo wa elabo ya vati athu yahikala edidelaga mikalelo miinddi dhohooneya dha Mulugu: Kopolo dhaaye dhohumala teto omulugu waaye woohumala. Yoodidela vowoona dhedho Mulugu dha-paddusiliye. Ndo kinna woothawela. ²¹Mwaha wi naari yamunonileve Mulugu, kayamuthithimihile naari omutthettheela wona mwafuneyeliwa. Moohiyaniha, moobuwelelo eewa yahisadduwa okala eebeweene teto mirima dheewa dhoolodhowa mwahidhaala yiihi. ²²Naari aliwa yiiraga wi ba tthottho, enosadduwa okala ataduwa. ²³Ocenja omuthithimiha Mulugu oohukwa, waweedbhaga amilugu oosemiwa wona athu enakwa wona balame, aneenyama a meddo minnaye ni dhowiiburula.

²⁴Bumwahaya Mulugu waapelekeliye wi yiiregena dhoojeberuwe dhedho mirima dheewa dhinafuniwa, ohaahiya onyemula mwiili dheewa vikaleliisu. ²⁵Vowi aliwa ehicenja ebaribari ya Mulugu ni dhoo-ratha. Wambeela weebedha ni wiimelela dhoo-paddusiwa vamburoni va omweebedha ni omwiimelela Mpaddusi oli oothithimiheya okala ni okala. Amen.^e

²⁶Mwaha wa dhedho Mulugu ohaapeleka wi eharege dhikwaminigwa dhookaliha manyazo. Ahiyana ehicenja ogona ni alobwana, ogonihanaga ahiyanave, meerelo ehili oobaliwana. ²⁷Emodha-modhave alobwana ehicenja ogona ni ahiyana, waakalelaga minigwa vajinji alobwana akwiwa wiiragana dhookaliha manyazo vikaleliisu mowindo yahiyiithanela goyi yoofwanelela mooligana ni dhoovirigana dheewa.

²⁸Mwaha wi aliwa yahimunyemula Mulugu teto Mulugu ohaapeleka mmoo-buweloni mweewa ootakala wi yiiregena dhego dhoo-hufwanelela. ²⁹Aliwa ehidhaaliwa ni dhohogoowa dha misawo dhaatedhene, obure, nrima, dhootakala. Ehidhaaliwa nihidda, opanana, owana, oratha wiiddana, onanlalave, ³⁰enowiirana dha odhuvudhuvu teto enowiiddana ni Mulugu. Beebewe, owiithukulela, oogaya. Enosayela dila dhixa dhowiirana dhootakala. Kinawiiwelela abaabi eewa. ³¹Ataduwa, oohuroromeleya, ootakala mirima naari ohukanna thagaraga. ³²Naari eganonileve magano a Mulugu owi athu owiirana dhowindala boofwanelela okwa, aliwa enowiirana dhedho teto enofiyedha waatthettheela ale eneerana.

^d 1.17 Habakuki 2.4 ^e 1.25 Amen enatapulela *Dhikale ndo*, naari wi Siibaribareene.

Mulugu onoodha aathonge athu aatene

2 ¹Vano we onaathonga amohi kwinna voothawela. Wamuthongaga mukwaawo wiiragana dhimohive dhedho dhineeriye, oneekona weeka. ²Nihinona wi othonga wa Mulugu wa athu ale eneerana dhego ndo fooligana ni ebaribari. ³Ki vano, we mukwaaga, onaathonga amohi eneerana dhootakala, we teto wiiragana dhimohive, onoobuwela wi onoodha othawe othonga wa Mulugu? ⁴Sowi we onavevusa owoma muri-ma vajiinji wa Mulugu, ohuthonga waaye, ovilela waaye? Kunadidela wi owoma murima wa Mulugu funoothukulela omattthwaruwelo?

⁵Mwaha wi oli a murima wovaadda, woohufuna otthwaruwa, ohiyuugelela owali va nlabo na owali wa Mulugu, wadha wooneyihiwaga othonga waaye wowogoowa. ⁶Mulugu onoodha amwaakelihe kadda muthu mooligana ni dhowiira dha muthu oyo.^f ⁷Wa ale enavilela mowiirana opama, enosayela nthithimiho, nriiho ni egumi yoohuvudda, Mulugu onoodha aavahe egumi yoohumala. ⁸Mbwenye wa ale ehineewelega ebaribari, eneewelega dhohogoowa, oliye onoodha ooneyihe owali ni waanyanyuwela owiithukulela. ⁹Onoodha okale goyi ni dhoo-kathamihwa wa aatene eneerana dhootakala, vovambeela aZhudewu, vooharela aGerego. ¹⁰Mbwenye onoodha okale nthithimiho, nriiho ni murenddele wa aatene eneerana dhapama, vovambeela aZhudewu, vooharela aGerego. ¹¹Vowi Mulugu kannna nsakulo.

¹²Vowi muthu oli aatene onathega moohunona Malamulo a Mulugu teto ahinonile Malamulo onoodha atolosiwe. Teto aatene ayene enathega eganonile Malamulo, moohariha Malamulo ayo enoodha ethongiwe. ¹³Vowi owogoowa vameentoni va Mulugu kahuwo oyene oneewa Malamulo baahi, mbwenye duule oneerana dhinawogiwa mMalamuloni dineeriwa owogoowa. ¹⁴Vowi athu ayene ehili aZhudewu ehinna Malamulo, vano aliwa yeeragana weekiwa dhedho dhinawoga Malamulo enowooniha wi ehikanna malamulo mamohi mmirimani mweewa, naari ehinna Malamulo a Mozezi. ¹⁵Dhowiira dheewa dhinowooniha wi dhinawoga Malamulo dhihilebiwa mmirimani mweewa. Moobuwelelo eewa teto enowiirela onamoona wi pumwemo, mwaha wi moobuwelelo a mmirimani mweewa mudhidhi mmohi enowaasumela, mudhidhi mmohiwa enowawaakihedha. ¹⁶Ndo dhineere opadduwa va nlabo nddo Mulugu vineeriye aathonge, odheela mwa Yesu Kirixtu, dhowiipiteya dha athu mooligana ni Muselu Wapama onalaleyimi.

AZhudewu ni Malamulo

¹⁷Vano we oni: “Gili muZhudewu”, onanyinddela Malamulo teto onomugayela Mulugu aawo. ¹⁸We ohunona Mulugu dhinafuniye, onothetheela eli yapama mwaha wi ohusuuzihiwa Malamulo. ¹⁹Onoro-

^f 2.6 Moone Masaalimu 62.12; Poroveribiyo 24.12

romela wi oli musogoleli a athu oohoona, panti yowaamoneya athu eli muyihini, ²⁰namalaga a athu oolodhowa teto namasuuziha a ahima. Onowuubuwelela wi mMalamuloni futaganele tthottho dhaatedhene ni ebaribari yaatene. ²¹Vano we onaasuuziha amohi, mwaha kuneesuuziha weeka? We onalaleya, wiiraga: “Kamwiiyege”, ki we oneeyela ddi? ²²We onawoga wi: “Kamuraruwege”, ki we onararuwela ddi? We onatakaleliwa ni amilugu oosemiwa, ki we oneeyela ddi dha mowebedha mweewa? ²³We onagayela Malamulo, ki onamunyemulela ddi Mulugu ohiwelelaga Malamulo ayo? ²⁴Eli wona munawogela Maleba, yiiraga: “*Athu oode enomunyemula Mulugu mwaha wa nyo aZhudewu*”.⁸

²⁵Wiineliwa waawo foopuriha akala onohariha Malamulo. Mbwenye akala kunahariha Malamulo ayo wiineliwa waawo kwinna thima, ohusadduwa oluku. ²⁶Ki akala muluku onohara dhinawoga Malamulo, muthu oyo kadha eeriwa wona owiineliwa? ²⁷We wiineliwe winna Malamulo oolebiwa, vano onowaaviriganiha. Ole ohugwaddiwe mmwiilini mwaaye aharihaga Malamulo dinaadhe ookone we oli owiineliwa.

²⁸Vowi kahuwo muZhudewu oneyooneyiha mmwiilini mwaaye, naari wiineliwa wa ebaribari kuneeriwana ode wa mwiili. ²⁹MuZhudewu a ebaribari di oyene oli muZhudewu mmurimani mwaaye wiineliwa wa ebaribari bwa mmurimani, oneeriwana ni Muneba Woweela, ohuli ni Malamulo oolebiwa, eehi. Athu kinamutamaalela muthu owindo, onamutamaalela di Mulugu.

3 ¹Ki vano aZhudewu enaakwaranya athu a malogo mamohi addi? Naari vowiineliwa vili mpurelo baani? ²Vihikala mpurelo dhijinji ebaribareene okala muZhudewu. Vowambeela, yahiroromelihiwa madhu a Mulugu.^h

³Ki akala amohi mwa aliwa yaali oohuroromeleya, ohuroromeleya weewa onomaliha ororomeleya wa Mulugu? ⁴Nivang'onong'ono! Mbwenye sowi athu enone wi Mulugu da ebaribari, naari athu aatene egali ooratha. Dhili wona Maleba munawogeliwa, yiiraga:

*“Nyo Mulugu, munowooneyihiwa
wi muli owogoowa mmadhuni mweenyu,
mwaathongiwa, munogonjiha”.*ⁱ

⁵Vowi athu amohi enokoha, yiiraga: “Akala dhohogoowa dheehu dhinowooniha dhowogoowa dha Mulugu, oliye kahuwo oohogoowa vinanilagiye?” ⁶Nivang'onong'ono! Mulugu ahaakale oohogoowa, aande waathonga athu a elabo ela addi? ⁷Mbwenye mmohi onowoga: “Ki ora-

⁸ 2.24 Ezaya 52.5; Ezekiyeli 36.20 ^h 3.2 Moone Deteronomiyo 4.7-8 ⁱ 3.4 Masaalimu 51.4

tha waaga ogooneyihile voweela wi Mulugu da ebaribari, weenjhedha vanthithimiho naaye, naari ngalive namathega onaagithongele ddi?”

⁸Mwa mukalelo mmohive athu amohi enoninyemula yiiraga hiyo nnosuu-ziha, niiraga: “Niiregena dhootakala wi opama odhe”. Othongiwa weewa foofwanelela.

Kalivo muthu owogoowa

⁹Ki vano, niirege avi? Hiyo aZhudewu nnowaakwaranya athu a malogo mamohi mmoobuweloni a Mulugu? Nivang'onong'ono! Ginowogesa wi athu aatene, aZhudewu vamohi ni aGerego eno-lamuliwa ni owodha wa yoothega. ¹⁰Wona mulebeliwiwa, yiiraga:

- “Kalivo muthu owogoowa,
ebaribareene naariwene mmohi.*
- ¹¹ *Kalivo muthu atthotho,
kalivo muthu onasayela omunona Mulugu.*
- ¹² *Aatene ehiholowa,
vamohi ehieyelela thima yeewa,
kalivo oneerana dhapama,
ebaribareene naariwene mmohi”.*^j
- ¹³ *“Vamelo veewa masiye oohuvuheleliwa,
ni malumi eewa enonyengetha,
ndibwi na mare a evili nili mmilomoni mweewa”.*^k
- ¹⁴ *“Muwano mweewa muhudhaala dhoodduba,
muhudhaala madhu oowaawa”.*^l
- ¹⁵ *“Manyalo eewa enothamagela
oporosa ni waapa athu.*
- ¹⁶ *Onoonga ni orabuliha dhili mundila mwiwa,
17 dila ya murenddele kinonile”.*^m
- ¹⁸ *“Meento eewa kinooneyiha
omoova Mulugu”.*ⁿ

¹⁹Vano nihinona wi dhaatedhene dhedho Malamulo dhinawogiiwa, dhinaakalela ale enalamuliwa ni Malamulo ayo. Malamulo enowoga dhego dhedhi wi yaamaalihe athu aatene vano aliwa ethongiwe ni Mulugu. ²⁰Vowi kalivo muthu Mulugu onamwiiriye owogoowa mwaha wa ohariha Malamulo. Vowi Malamulo enooniha dhoothega dheehu baahi.

^j 3.10-12 Masaalimu 14.1-3; 53.1-3 ^k 3.13 Masaalimu 5.9; 140.3 ^l 3.14 Masaalimu 10.7
^m 3.17 Ezaya 59.7-8 ⁿ 3.18 Masaalimu 36.1

Mwemo Mulugu munawiireliye athu owogoowa

²¹Mbwenye dhiinova ohooneyihiwa wa athu wogoowa wa Mulugu ohunaakeliwa moohara Malamulo aaye. Wogoowa wula Malamulo ni anamavuhulelene enowiirela onamoona, ²²wogoowa wula onaakeliwa mwa nrromelo mwa Yesu Kirixtu wa ale enamuroromela. Kavili ohiyana vaari va athu, eehi, ²³vowi aatene ehithega, kinafiyedha nthithimiho na Mulugu. ²⁴Mbwenye mwa mahala aaye, Mulugu onowawira owogoowa veebwenivene odheela woobola oli mwa Yesu Kirixtu, ²⁵ole Mulugu omveleeliye wona mukutho wookurumula owali waaye mwaha wa hiyo, odheela mwazi wa Yesu Kirixtu, onaakeliwa odheela mwa nrromelo. Mulugu ohiirana dhedho wi oonihe wogoowa waaye. Vowi wale mwa okurumuwela waaye ahihiya ovira dhoothega dha mundduli. ²⁶Mbwenye mudhidhi ola onowooniha wogoowa waaye mwa mukutho ola wookurumula wi Mulugu akale owogoowa, akale ole onawira owogoowa aatene enamuroromela Yesu Kirixtu.

²⁷Ki vano vevo muthu agayege? Eehi, kagayewene. Mwaha wa ddi? Mwaha woohaakwaniha ohara ni wiiwelela nlamulo? Naari, kanigayege vovi naakelile wogoowa mwa nrromelo. ²⁸Vovi nnowoona wi muthu onowiiriwa owogoowa ni Mulugu voororomela, moolapelana ni Malamulo. ²⁹Sowi Mulugu di Mulugu a aZhudewu baahi? Oliye teto kahuwo Mulugu a athu a malogo mamohi? Ee teto di Mulugu a malogo mamohi, ³⁰vovi oliwo Mulugu mmohi baahi, Mulugu mmohive oyo odheela mwa nrromelo baahi, onowawira owogoowa athu aabiileene owiineliwa naari oohiineliwa. ³¹Sowi naharaga nrromelo nnakoooda Malamulo a Mulugu? Nivang'onong'ono! Moohiyaniha, nnalibiha Malamulo.

Nrromelo na Abarhamu

4 ¹Vano niwoqe avi dha nikolo neehu Abarhamu? Oliye afwanyilemo ddi? ²Mulugu ahamwiire Abarhamu owogoowa mwaha wa dhowiira dhaaye, eere okalana mwaha wowiithukulela, mbwenye kanna mwaha wowiithukulelana vameentoni va Mulugu. ³Ki Maleba yiire avi? Yiire: *“Abarhamu ahimuroromela Mulugu, voomuroromela, Mulugu ahimwiira owogoowa”.*^o

⁴Vano muthu alaba mabasa, yooliveliwa yaaye kahuwo mvahi, si yoo-fwanelela yaaye. ⁵Vano ole ohunaroromela meerelo aaye mbwenye amuroromelaga ole onawiriha anambure wi ekale owogoowa, nrromelo na muthu oyo, Mulugu onowiira wogoowa. ⁶Davidi ahiwoga dhimohive, awogaga dha ohagalala wa muthu Mulugu onamwiiriye owogoowa ahi-sugwaga meerelo. Davidi ahiira:

^o 4.3 Wambeela 15.6

- 7 “Ooreelihiwa baale
 dhabure dheewa dhileveleliwe,
 ayene dhoothega dheewa dhithimihiwe.
 8 Dooreelihiwa muthu oyene Nabwiya
 ohunamweelengeliye dhoothega dhaaye”.

9 Ki ohagalala wula onaakale wa athu owiineliwave baahi, naari teto ni alukweene? Vowi nihiwoga wi Abarhamu, odheela nrromelo naaye, Mulugu ahimwiira owogoowa. 10 Ela epadduwile alini? Abarhamu ageaneliwe naari ahineeneliwe? Ebaribareene epadduwile ahineeneliwe. 11 Wiineliwa waaye waali wona etoonyihedho yooniha wi Mulugu ahimwiira owogoowa mwaha wa nrromelo nanniyena ahineeneliwe. Mowindo Abarhamu di baabi a athu aatene enamuroromela Mulugu wi yiiriwege owogoowa naari egalive aluku.^p 12 Teto di baabi a owiineliswa ehili oogwaddiwave mmwiilini baahi, mbwenye teto eneedda mundila mwa nrromelo needda babiihu Abarhamu ahineeneliwe.

Nrromelo na Abarhamu ni yoororomeliha ya Mulugu

13 Abarhamu ni anamabaliwelamo aaye yahaakela wa Mulugu nrromeliho nowi elabo ya vati enoodha ekale yeewa, ehili mwaha woohariha Malamulo, mbwenye mwaha wowogoowa wookumela munrromeloni. 14 Akala ale enaroromela Malamulo enoodha yaakele dhedho Mulugu dhiroromelihiye, nrromelo kannapura yego teto yoororomeliha eyo enothimihiwa. 15 Mwaha wi Malamulo enotatamula owali. Vano vihili Malamulo, kavili ohiiwelela.

16 Mwahaya buuyene wi yoororomeliha ya Mulugu enavahiwiwa mwa nrromelo wi yoororomeliha eyo ekale mvahi wa mahala wi ekale yowaalibihana anamabaliwelamo aatene a Abarhamu, alene enahara Malamulo a Mozezi teto ale yinna nrromelo nanna Abarhamu. Oliye di baabi a hiyo aatene. 17 Dhili wona muwogele Mulugu ni Abarhamu mMalebani Ootaleleya, eera: *“Guhuuthoma wi okale baabi a malogo majinji”*.^q Oliye dineeriwa babiihu ni Mulugu oyene Abarhamu amuroromeliye, onawelihedha egumi wa anookwa teto onakalihawo dhego dhihiliwo.

18 Naari wahaaliwoove mwaha woorejhedha, Abarhamu ahiroromela yoororomeliha ele. Mowindo ahisadduwa okala baabi a malogo majinji, mooligana mwamwaaddelele Mulugu, eera: *“Anamabaliwelamo aawo enaakale ajinji wona ttenderi”*.^r 19 Oliye aganna vakukuuve yaaka zana, ahitthabwa wuuluvala, kaakwaniha obala. Teto Saara ahuluvala, kaabale. Abarhamu ahinona dhaatedhene dhedho, mbwenye nrromelo

^p 4.11 Moone Wambeela 17.10-11 ^q 4.17 Wambeela 17.5 ^r 4.18 Wambeela 15.5

naaye kanavolole. ²⁰Naari ndo kaanganyedhe, naari kaahiyile ororomela yoororomeliha ya Mulugu, mbwenye oomuthithimiha Mulugu, okala ooliba munroromeloni naaye. ²¹Oliye ahikanna ebaribari wi Mulugu onowaanda wiirana dhedho dhiroromelihiye. ²²Mwaha wa eyo: “*Mulugu ahimwiira Abarhamu owogoowa*”.^s

²³Madhu ala enawoga wi: “Nabwiya ahimwiira owogoowa”, kayalebeliwe opama wa Abarhamu yeeka, eehi, ²⁴teto elebeliwe wa hiyo. Mulugu teto ononiira owogoowa hiyo nnamuroromela ole amvenyihile muukwani Yesu, Nabwiya eehu. ²⁵Yesu oyo ahipelekiwa wi apiwe olivela dhooviriganiha dheehu teto ahivenyihwa muukwani wi niiriwege owogoowa ni Mulugu.

Murenddele ni ohagalala.

5 ¹Vowi odheela mwa nrromelo nnowiiriwa owogoowa ni Mulugu, nihikanna murenddele ni Mulugu odheela mwa Yesu Kirixtu Nabwiya eehu. ²Oliye dinifugulele dila wi voororomela naakele mahala Mulugu enanivahiye, mukaraatiliihu dhiinova. Mowindo nnogayela moojejiha nthithimiho na Mulugu. ³Vano kahuwo eyeneve, eehi, nnohagalala mugoyini mweehu, vovi nnonona wi goyi enosuuziha ovilela, ⁴ovilelawo onodhiha otthettheeliwa teto otthettheeliwa wula onodhiha ojejihedha. ⁵Ojejihedha wula kunanikaliha manyazo, vovi Mulugu ohudhaaliha mmirmani mweehu ni odhivela waaye odheela Muneba Woweela onivahiliye.

⁶Mwa mudhidhi olene hiyo vaaliihu oolodhowa Kirixtu ohaakwela athu oohumuriha Mulugu. ⁷Soorusa vajinji orumeedha wi muthu amukwele owogoowa, kaahi akale ooliba murima apeleke egumi yaaye wi amvulumuse muthu apama. ⁸Mbwenye Mulugu ohooniha odhivela waaye ni hiyo mwa mukalelo ola: Kirixtu ohunikwela naari nigalive anamathega.

⁹Akala mwaha wa mwazi wa okwa waaye nihiiriwa owogoowa ni Mulugu, mowindo siibaribareene wi omamalelo wa elabo, Kirixtu onoodha anivulumuse mwa owali wa Mulugu. ¹⁰Naari naalive amwiiddani a Mulugu, nihaandanihiwa ni oliye odheela mwa okwa wa Mwaanaye. Mowindo dhiinova wona nihaandanihiwa ni Mulugu, ebaribari yeehu enoweenjedhedheya vajinji wi nneere ovulumusiwa odheela mwa egumi ya Mwaanaye. ¹¹Kahuwo dhedhove teto nnogaya mwa Mulugu odheela mwa Nabwiya eehu Yesu Kirixtu, oyene onaandanihile dhiinova ni Mulugu.

Adamu ni Kirixtu

¹²Yoothega yahivolowa mwiilaboni ni muthu mmohi, yoothega eyo yahidhiha okwa. Mwa mukalelo mmohive okwa ohaamwadheyela athu aatene, vovi aatene yahithega.

^s 4.22 Wambeela 15.6

¹³Vano yoothega yahikalawo veelaboni ya vati Mulugu ahinaveleele Malamulo a Mozezi, vano vihili malamulo yoothega kineelengiwa. ¹⁴Wambeela mudhidhi wa Adamu ofiyedha Mozezi, okwa wahikanna owodha wa athu aatene, naari dhoothega dheewa dhaalive dhoohiyana ni ele ya Adamu. Oliye amutajihedha ole aadhe. ¹⁵Mbwenye mvahi onaakeliu mwa mahala a Mulugu kunaliganihwa ni yoothega. Odheela mwa yoothega ya mulobwana mmohi, athu ajinji ehikwa. Odheela wa mvahi wowogoowa onadha wa mulobwana mmohi, Yesu Kirixtu, athu ajinji ehaakela mootekuma mahala a Mulugu. ¹⁶Adamu ahikoniwa agathegile dila emohi, mbwenye mvahi wa Mulugu oli woohiyana. Mvahi wa Mulugu onowaavulumusa athu naari egathegile dila dhijinjidhene. ¹⁷Mwaha wa othega wa muthu mmohi, odheela mwa oliye, okwa woolamula. Tthabwa-tthabwa odheela wa muthu mmohi, Yesu Kirixtu, ale enaakela wa Mulugu mahala ootekuma ni mvahi wa dhowogoowa, aliwa eneerege olamula okala ni okala.

¹⁸Mowindo, wona mwa yoothega emohi ajinji yahikoniwa teto mwa yowiira emohi yowogoowa athu ajinji enowiiriwa owogoowa, vano enokalana egumi. ¹⁹Vowi mwaha wohiwelela wa mulobwana mmohi athu ajinji yahisadduwa okala anamathega, emodha-modhave mwaha wowiwelela wa mulobwana mmohi, ajinji eneere wiiriwa owogoowa.

²⁰Mulugu avelele Malamulo wi athu enone wiinjiva wa dhoothega dheewa. Dhoothega veenjehedheyiwa, mahala a Mulugu yahrenjedhedheya mookwaranya dhoothega nde. ²¹Nda dhihipadduwa wi wona yoothega enalamula odheela okwa, emodha-modhave mahala a Mulugu enolamula odheela wogoowa wi onivahe egumi yoohumala odheela mwa Yesu Kirixtu, Nabwiya eehu.

Okala ni egumi mwa Kirixtu

6 ¹Vano niwoge ddi? Nikalegeve mudhoothegani wi owoma murima wa Mulugu weenjehedheyegeve? ²Eehi, nivang'onong'ono! Hiyo nikwile wa yoothega, nikalegeve mudhoothegani? ³Kamunonile wi hiyo aatene nibathiziwe mwa Yesu Kirixtu, nili muumohini ni oliye mwa okwa waaye? ⁴Vowi nihikwa, nihilogohiwa ni oliye mwa obathiziwa weehu wi mwa mukalelo mmohive wavenyihwiwe Kirixtu muukwani ni nthithimiho na Ababe teto hiyo needdege mwiigumini exa.

⁵Ndala akala nili muumohini ni Kirixtu mwa okwa waaye, ebaribareene nnokala muumohini ni oliye va ovenyihwiwa muukwani. ⁶Nihinona wi omuthu weehu wawale ohukomeliwa vamuraddini vamohi ni Kirixtu wi omuthu weehu woothega ohukalena owodha wa hiyo wi nihiwelele okala adhaari a dhoothega. ⁷Vowi muthu okwile ohutapuliwa mwa owodha wa yoothega. ⁸Vano akala nnokwa vamohi ni Kirixtu, nnororomela wi

nnoodha nikale teto ni egumi vamohi ni oliye. ⁹Nihinona wi Kirixtu ahi-venyihwa muukwani, ndo kadha akwa dila biili. Okwa kunamulamula oliye. ¹⁰Owoga dha okwa waaye okwele wi amarihe kuluwi olamula wa yoothega. Vano owoga dha egumi yinniyyena dhiinova, onakala wa Mulugu. ¹¹Emodha-modhave nyoovo mwiyyire ookwa mwa olamula wa yoothega teto mwiyyire agumi wa Mulugu, muumohini ni Yesu Kirixtu.

¹²Mwaha wa ela kamurumeedhe yoothega elamulaga mwiili dheenyu dhili dhookwa wi mwiiwelelege dhikwaminigwa dhiwa. ¹³Kamveelele yaano dha mwiili dheenyu wona yeela dha dhohogoowa, dhowiirana yoothega. Moohiyaniha, mwiiwelele wa Mulugu wona athu evenyihwe muukwani, dhiinova eli agumi. Vano mvelele yaano dheenyu wa oliye wona yeela dha dhowogoowa. ¹⁴Vowi yoothega kidha yuulamulagani, mwaha wi kamuneewelega Malamulo, mbwenye muli ookuneeliwa ni thagaraga dha Mulugu.

Yoolivela ya yoothega fuukwa

¹⁵Ki vano? Nithegegeve vovi kanili vati va Malamulo, mbwenye nili vati va owoma murima wa Mulugu? Eehi, nivang'onong'ono! ¹⁶Mhunona wi mwevelelela wa muthu wi mmwiiwelelege wona adhaari, muna-kala adhaari a muthu oyo: Adhaari a yoothega enoothukuleleni okwa, naari adhaari a owiiwelela onoothukuleleni okala owogoowa. ¹⁷Ginomotthetheela Mulugu mwaha wi wale nyo mwaali adhaari a yoothega, mbwenye dhiinova, muneewelega ni murima waatene dhosuuziha dhedho dhaakeliliinyu. ¹⁸Mhutapuliwa mwa yoothega, dhiinova muli adhaari a dhowogoowa. ¹⁹Ginowuwaaddelani wona athu mwaha wi dhili dhoorusa nyo wiiwelelamo. Wale mwahivelelela yaano dha mwiili dheenyu wona adhaari a dhootakala, dhohogoowa dhinabala dhohogoowa dhimohi. Dhiinova mvelele yaano dheenyu wi mukale adhaari a dhowogoowa dhinothukuleleni weela mirima.

²⁰Vowi mwaaliinyu adhaari a yoothega, mwaali ootapuwa wiing'aneliwa ni wogoowa. ²¹Ki vano mpurilevo ddi voviirana dhego dhinookalihani manyazo dhiinova? Vovi ndo, omamalelo wiwa fuukwa. ²²Mbwenye dhiinova muhutapuliwa mwa yoothega, muli adhaari a Mulugu. Vano yoopura yeenyu fuweelihiwa, omamalelo wiwa munokalana egumi yoohumala. ²³Vovi yoolivela ya yoothega fuukwa. Mbwenye mvahi wa mahala Mulugu onavahiye si egumi yoohumala muumohini ni Yesu Kirixtu Nabwiya eehu.

Musibe wa matelo

7 ¹Addibilaga, arogoraga, ginawoga ni nyo munonile dha malamulo. Muhunona pama wi Malamulo enalamula dha muthu agali mugumi baahi. ²Pumwemo: Nlamulo nnawoga wi mwihiyana ooteliwa doomage-

ya ni mamune mudhidhi waatene agali mugumi. Vano mulobwanaya akwa, mwihiyana onotapuwa mmalamuloni n nawoga dha matelo.

³Mowindo ateliwa ni mulobwana mmohi, mamune agali mugumi, mwihiyana oyo nlamulo nnamwiira ooraruwa. Mbwenye mamune akwa, mwihiyana ole ohutapuwa mmalamuloni a matelo, mowindo ateliwa ni mulobwana mmohi kanakala namararuwa.

⁴Amudhaaga, emodha-modhave nyo teto muli ookwa voviiwanana ni Malamulo, vovi nyo muhukwa vamohi ni Kirixtu. Ela yaali wi mukale a mmohi, ole ovenyihiwe muukwani. Muli a Kirixtu wi mvahe dhoovaha wa Mulugu.

⁵Vowi valamuliwiihu ni omuthu weehu, dhikwaminigwa dhoothegih, dhedho Malamulo dhatatamuliwa, dhalaba mwa hiyo, mowindo noovaha dhoovaha dhanithukulela okwa. ⁶Mbwenye dhiinova nihitapuwa mMalamuloni. Nili ookwa mMalamuloni, ayene wale yanimaga. Dhiinova Muneba Woweela ononikamihedha omwiimelela Mulugu mwa dila exa, ehili mwa dila yawale ele yoocharaga Malamulo oolebiwa.

Malamulo a Mulugu ni yoothega

⁷Vano niwoge ddi? Niwoge wi Malamulo a Mulugu si yoothega? Nivang'onong'ono! Ebaribareene Malamulo ayo ehiginoniha yoothega. Vovi kagaanone otakala wa osilila, nlamulo naheere nihiwoga, niira: “*Kusilile*”.^t ⁸Mwaha wa nlamulo nddo, yoothega yahifwanya mpatha ovenyiha mwa miyo makalelo a osilila oohiyana-hiyana. Vovi vihili Malamulo, yoothega ehikwa. ⁹Wale ganna egumi yoohunona Malamulo. Mbwenye vevo vambeeliimi onona nlamulo, yoothega yahambeela oliba, mowindo miyo okwa. ¹⁰Vano nlamulo nddo nafwaneele waafiyiha athu wiigumini, nihigifiyiha omakwelo. ¹¹Vovi yoothega egafwanyile mpatha wavahile nlamulo, mwa nlamulo nddo, yoothega yahiginyengetha, ogipa.

¹²Mohaanganyedha, Malamulo a Mulugu boweela teto kadda nlamulo thoweela, nowogoowa, napama. ¹³Ela sowi yego yapama ehigithukulela omakwelo? Nivang'onong'ono! Mbwenye yoothega sigipile volabiha yego yapama. Mowindo, odheela mwa nlamulo, makalelo a ebaribari a yoothega ehooneyihiwa voweela wi sootakala mookwaranya.

Makalelo meenddi enawana muwari mwa muthu

¹⁴Nihinona wi Malamulo a Mulugu ba omulugu. Mbwenye miyo gili mwa omuthu, ogulihwi wona mudhaari a yoothega. ¹⁵Kaginanonelamo nde dhineeriimi. Vovi kagineerana dhinafuniimi wiirana, mbwenye dhineeddaniimina sineeriimina. ¹⁶Akala gineerana dhihinafuniimi, ginarumeedhela wi Malamulo a Mulugu bapama. ¹⁷Mowindo kahuwo miyo

^t 7.7 Okuma 20.17; Deteronomiyo 5.21

gineerana yabure, mbwenye yoothega enakala mwa miyo. ¹⁸Gihinona wi mwa miyo kamunakala yego yapama, ela sowi omuthu waaga. Gihinona ndo mwaha wi naari gifunaga wiirana dhapama, kaginaanda wiirana. ¹⁹Kagineerana dhapama dhinafuniimi, mbwenye gineerana dhootakala dhihinafuniimi, ndo ginowiirana. ²⁰Akala ginowiirana dhedho dhihinafuniimi, kahuwo miyo oneerana, mbwenye yoothega enakala mwa miyo sineerana.

²¹Ndala ginowoona nlamulo ndda: Gaafunaga wiirana dhapama, ginafwanya dhootakala vakukuve vaaga. ²²Murima waaga onohagalala ni Malamulo a Mulugu, ²³mbwenye ginowoona muwari mwaaga wi nihikalawo nlamulo nimohi nnawana ni nlamulo nnarumeedhiimi mmoobuweloni mwaaga, nlamulo nimohi nddo nnogiriha okala mudhaari a nlamulo na yoothega enakala muwari mwaaga. ²⁴Ooddilu di miyo! Onaagitapule baani mwiili waaga ola onagithukulela omakwelo? ²⁵Ginomutthetheela Mulugu onivulumusile odheela mwa Nabwiya eehu Yesu Kirixtu! Mowindo ginofuna omwiimelela Mulugu mmoobuweleloni mwaaga, mbwenye muwari mwa omuthu waaga, ginahara nlamulo na yoothega.

Egumi mwa Muneba Woweela

8 ¹Mowindo dhiinova kudha okala okoniwa wa athu eli mwa Yesu Kirixtu. ²Vowi nlamulo na Muneba Woweela, nnanivaha egumi mwa Yesu Kirixtu, nihigitapula mmalamuloni a yoothega ni a okwa. ³Mulugu ohiirana dhedho Malamulo a Mozezi dhahaandiliwa wiirana, mwaha wi Malamulo ayo yahilodhosiwa ni omuthu weehu wootedemanela dhootakala. Mulugu ohukona yoothega mmwiilini, voomurumiha Mwaanaye mwa mwiili wona muthu oothega. Yoothega eyo ehibwanyula mwa omuthu. ⁴Mulugu ohiirana nda wi wogoowa walamuleliwa ni Malamulo a Mozezi naande waakwaniha. Nihaanda waakwaniha ndo mwaha wi dhiinova kannahara omuthu weehu, mbwenye nnahara Muneba Woweela.

⁵Athu enahara epaddi ya omuthu, moobuwelelo eewa enatedemanela dha omuthu. Mbwenye athu enahara Muneba Woweela, moobuwelelo eewa enoobuwelela dhedho dhinafuni Muneba Woweela. ⁶Ohela moobuwelelo a omuthu fuukwawene, mbwenye ohela moobuwelelo dhedho dhinafuni Muneba Woweela, onodhiha egumi ni murenddele. ⁷Moobuwelelo a omuthu omwiiddani ni Mulugu, mwaha wi kineehela vati va Malamulo aaye. Owoga mwa ebaribari, kinaakwaniha. ⁸Ole onakala mwa omuthu kanaanda omuhagalaliha Mulugu.

⁹Mbwenye nyo kamunakala mwa omuthu. Munakala mwa Muneba Woweela, akala Muneba oyo wa Mulugu onakala mwa nyo. Mbwenye akalavo ohinna Muneba wa Kirixtu, ebaribareene kahuwo a Kirixtu.

¹⁰ Akala Kirixtu oli mwa nyo, naari mwiili dheenyu dhigakwile mwaha wa dhoothega, munovahiwa egumi ni Muneba Woweela mwaha wi Mulugu onowuwirani owogoowa. ¹¹ Muneba wa oyene amvenyihile Yesu muukwani wakala mwa nyo, oyene amvenyihile Kirixtu muukwani onoodha avahe teto egumi mwiili dheenyu dhookwa, odheela mwa Muneba waaye onakala mwa nyo.

¹² Mowindo addibilaga, arogoraga, nihikalana mangawa, mangawa ayo kahuwo wi niharege dha omuthu. ¹³ Vowi akala munahara mukalelo oyene wa omuthu, munoodha mukwe; mbwenye akala ni nikamihedho na Muneba Woweela munoopa meerele eenyu ootakala, munoodha mukalena egumi.

¹⁴ Athu aatene ayene Muneba wa Mulugu onaasogoleliwa, bi ahima a Mulugu. ¹⁵ Muneba waakeliliinyu kunookalihani adhaari wi moovege dila biili. Moohiyaniha, mwaakelile Muneba onowiirihani wi mwiithaniwege ahima a Mulugu. Odheela mwa Muneba oyo nnowundda, niiraga: “Aba!^u Babani!” ¹⁶ Mwiinyeene Muneba Woweela onowiirela onamoona wa mirima dheehu wi nili ahima a Mulugu. ¹⁷ Vano akala nili ahima a Mulugu, nnoodha naakele vamohi ni Kirixtu, mareeliho yanilogoleliiye. Nnoodha naakele vamohi ni Kirixtu akala nnorabula ni oliye wi nthithimihiwe vamohi ni oliye.

Nthithimiho nenddo nnadhiihu naakele

¹⁸ Miyo gihikalana ebaribari wi goyi enooniihu dhiinova kinaligana nivang'onong'ono ni nthithimiho nenddo Mulugu nnisasanyedheliye. ¹⁹ Dhoopaddusiwa dhaatedhene dhinajehi ni ofunesesa wi Mulugu aavuhulele anaaye voweela. ²⁰ Vowi dhoopaddusiwa dhahigonjihiwa ni dhoohunoneya, ehili ofuna weewa mbwenye Mulugu deerihile wi dhigonjihe. Ahiirana ndo ni ejjihedho ²¹ wi dhoopaddusiwa ndo dhinoodha dhitapuliwe mudhaarini woovudda ni waakela mootapuwa nthithimiho na ahima a Mulugu.

²² Nihinona wi ofiyedha dhiinova dhoopaddusiwa dhaatedhene dhinowundda ni dhoovoreya wona mwihiyana mudhidhi wa obala. ²³ Vano kahuwo dhoopaddusiwave dhinaandda, eehi, mbwenye teto hiyo ninna dhoovaha dhowambeela dha Muneba Woweela, nnowundda mmirimani, nijjihedhaga wi Mulugu anithome okala anaaye, ela sowi wooboliwa wa mwiili dheehu. ²⁴ Fumoojehedha mwemo nivulumusiwihi. Vano noonaga dhinajehihi, kahuwo ojejiha. Onajehedha enooniye baani? ²⁵ Mbwenye akala nnojehedha dhedho dhihinoonihi, nnojehedha nra-bulelaga ni ovilela.

²⁶ Mwa mukalelo mmohive, Muneba Woweela ononikamihedha mwa olodhowa weehu. Vowi hiyo kannonile olobela wona munafuneyeliwa.

^u 8.15 *Aba* enatapulela *babani* mu ewogelo ya eAramayiku.

Mbwenye Muneba Woweela mwiinya ononilobelela ni wiikubanyiha wookuwogeya. ²⁷Vano Mulugu onoono dha muwari mwa mirima dha athu, ohunona dhoofuna dha Muneba Woweela, mwaha wi onowaalobelela athu oweela mirima wona Mulugu munafuneliye.

²⁸Hiyo nihinona wi Mulugu onoweeddiha dhego dhaatedhene mwapama wa ale enamudhivela, ayene enawiithaniye mooligana ni moobuwelelo aaye. ²⁹Vowi Mulugu athu yaasakuliye wale-wale, oliye ahaathoma wi ekale wona oofwanafwana ni Mwaanaye wi Mwaana oyo akale owambeela mwa addibila ni arogora ajinji. ³⁰Mulugu kakule waathomave teto ahawiithana, vawiithaniliye teto ahawiira owogoowa, vawiiriliye owogoowa teto ahaathithimiha.

Odhivela wa Mulugu footikiniha

³¹Ki vano nnowoge ddi mwa dhedhi? Akala Mulugu oli mwa hiyo, onaanigonjihe baani? ³²Ole ohunikooddihedhe Mwaana aaye-aaye, mbwenye ahimvelela wa hiyo aatene, kananivahe dhaatedhene mwa mahala? ³³Onaasumele ale Mulugu yaasakuliye baani? Kalivo! Vowi di Mulugu mwiinyeene onawiira owogoowa. ³⁴Onaakone baani? Kalivo! Vowi Yesu Kirixtu, oyene akwile, avenyihwa muukwani, oyene okaraatile omoononi wooja wa Mulugu, di Yesu oyene onanilobelela. ³⁵Ki onaanimwalanihe ni odhivela wa Kirixtu baani? Enakale goyi, naari dhoovoreya, naari oharahariwa, naari dala, naari osiwa, naari dho-woopiha, naari okwa? Nivang'onong'ono! ³⁶Wona munawogela Maleba Ootaleleya, yiraga:

*“Mulugu, mwaha wowuudhivelani nyo,
malabo maatene nnajejihedha opiwa,
nneeriwa wona mabila enajejihedhiwana omapiwelo”.*^v

³⁷Mbwenye mwa dhaatedhene dhedhi nili oogonjiha mookwaranya, odheela wa ole onidhivele. ³⁸Ebaribareene gihinona mohaanganyedha wi kavili yego enaanimwalanihe ni odhivela waaye. Naari okwa, naari egumi, naari angero, naari mineba dhootakala, naari dhego dhiliwo, naari dhoosogolo, naari kopolo dhimohi, ³⁹naari dha odhulu, naari oddiha wa vati, naari yego emoheene yoopaddusiwa kidha enimwalaniha ni odhivela wa Mulugu oli mwa Yesu Kirixtu, Nabwiya eehu.

Mulugu ni nlogo nasakuliye

9 ¹Ginawoga ebaribari mwa Kirixtu, kaginaratha. Murima waaga, vamohi ni Muneba Woweela, onowiirela onamoona wi ²gihikanna

^v 8.36 Masaalimu 44.22

okubanya wuulubale teto ginovoreyiwa moohuiyedhedha mmurimani mwaaga mwaha wa amudhaaga, aEzarayeli. ³Gahaakwanihege waakami-hedha aliwa, goorumeedha oddubiwa, gimwalanihiwe ni Kirixtu mwaha wa odhivela wa addibilaga a nlogo naaga na omuthu. ⁴Aliwa ba aEzarayeli; aliwa Mulugu ahaasakula wi ekale anaaye; wa aliwa ahawooniha nthithimiho naaye. Ni aliwa ahisasanya nipangano no waandana, waa-vaha Malamulo, ahaasuuziha weebedha teto ahaavaha dhoororomeliha dhaaye.^w ⁵AEzarayeli anamabaliwelamo a makolo eehu: Abarhamu, Ezaaki ni Yakobo. Kirixtu obaliwe mwa nlogo nendda, nawogaga dha omuthu waaye, oliye di Mulugu onalamula dhaatedhene, doorelihiwa ofiyedha okala ni okala. Amen.

⁶Kahuwo wi Mulugu kaakwanihile wiirana dharoromelihiye. Vowi kahuwo anamabaliwelamo aatene a nlogo na aEzarayeli eli aEzarayeli a ebaribari. ⁷Kahuwo wi anamabaliwelamo aatene a Abarhamu bi anaaye. Vowi Mulugu ahimwiirela: *“Ahima a Ezaaki weekiwa bineethaniwege anamabaliwelamo aawo”*.^x ⁸Ela enatapulela wi kahuwo ahima aatene ebaliwe ni Abarhamu eli ahima a Mulugu. Mbwenye ahima oororomelihiwa weekiwa bineelengeliwa anamabaliwelamo a ebaribari a Abarhamu. ⁹Vowi Mulugu ahimuroromeliha oliye, wiira: *“Vavira yaaka ginowela, Saara oneere ombala mwaana-mulobwana”*.^y

¹⁰Kahuwo osakuliwave wa Ezaaki teto ahima abiili a Rabeka babiiwa aali mmohive, nikolo neehu Ezaaki;^z ¹¹⁻¹²naari anapata ayo ehinabaliwe, ehineerena yapama naari yootakala, Mulugu ahimwaaddelaga Rabeka, wiira: *“Mwaana owambeela obaliwa onoodha amwiimelelege amung'onong'onoya”*.^a Mulugu ahiirana dhedhi wi dhoofuna dhaaye dha omusakula muthu dhidhowegeve, kawaali mwaha wa dhowiira dha muthu, mbwenye mwaha wa ole onawiithana athu. ¹³Wona Maleba Ootaleleya munawogelihiwa, yiiraga: *“Yakobo gahimusakula, mbwenye Esawu gahimukooda”*.^b

¹⁴Ki vano, nnaowoge ddi? Mwa Mulugu muhukala dhohogoowa? Nivang'onong'ono! ¹⁵Oliye ahimwaaddela Mozezi, wiira: *“Ginoodha gimweeddiwele thagaraga oyene ginamfuniimi omweeddiwela thagaraga, ginoodha gimukurumuwele oyene ginamfuniimi omukurumuwela”*.^c ¹⁶Mowindo osakula wa Mulugu kunadheela mwa dhoofuna dha muthu, naari dhinaxixiye wiirana, mbwenye dhinadheela mwa ole winna thagaraga oli Mulugu. ¹⁷Vowi Maleba Ootaleleya yiire Mulugu ahiwoga ni Farawo, wiira: *“Guhuvvaha omwene wi ni we goonihe kopolo dhaaga teto wi ndina naaga nivuwihwe elabo yaatene ya vati”*.^d ¹⁸Mowindo Mulugu

^w 9.4 Moone Okuma 4.22; Deteronomiyo 7.6; 14.1-2 ^x 9.7 Wambeela 21.12

^y 9.9 Wambeela 18.10,14 ^z 9.10 Moone Wambeela 25.21 ^a 9.11-12 Wambeela 25.23

^b 9.13 Malakiya 1.2-3 ^c 9.15 Okuma 33.19 ^d 9.17 Okuma 9.16

onomweeddiwela thagaraga muthu onamfuniye, onomvaaddiha murima onamfuniye.^e

Owali ni thagaraga dha Mulugu

¹⁹Mowindo mmohi oneere ogikoha, eerege: “Dhakala ndo, ki Mulugu onanikonela ddi? Ki baani onaapambihe ofuna wa Mulugu?” ²⁰Muthu, we oli aani wi ovaanyihanege ni Mulugu? Yowuubiwa kinamukoha wuubile, yiira: “Oguubele ddi mowinda?” ²¹Namuuba kanna owodha wowuuba ni ologo mmohive dhibale biili, emohi yoolabihana dhooriiheya, emohiwa yoolabihana dhoonyemuwa?

²²Si dhedho Mulugu dhiiriliye. Afunile wooniha owali waaye teto wi kopolo dhaaye dhinoneye. Mowindo ahivilela vajinji wa ale yafwaneelele orabulhiwa, wona ebale yoonnyemuwa, ayene yaatolo-siwe. ²³Mulugu ahifuna teto wooniha nthithimiho naaye nuulubale nikuthuleliye, wa ale yaweeddiweliye thagaraga, wona ebale yooriiheya, nili ale yaasasanyedhiye wale wi yaakele nthithimiho naaye. ²⁴Vowi hiyo nili ale Mulugu yawiithaniliye, oohukala ookumela wa aZhudewu weekiwa, mbwenye teto ookumela wa athu a malogo mamohi. ²⁵Dhili wona Mulugu munawogeliye muniivuru na Ozeya wi:

*“Ginoodha githome: ‘Nlogo naaga’,
ale ehili a nlogo naaga,
ginoodha gimuthome: ‘Oodhivela aaga’,
ole gahamudhiveliimi.”^f*

²⁶*Vano mburo mmohive waaddeliwiwa,
yiira: ‘Kamuli nlogo naaga’,
vevo enoodha ethomiwe:
‘Ahima a Mulugu eegumi’ ”.^g*

²⁷Teto namavuhulela Ezaya ahiwoga moogweliha madhu dha a Ezarayeli, wiira:

*“Naari a Ezarayeli yinjivileve wona museenga wa munyaza,
athu oohala vang'ono binaadhe evulumusiwe.*

²⁸*Vowi Nabwiya onoodha aathonge athu a elabo
ya vati mowaaguva, mowaakwanela.”^h*

²⁹*Nda dhili wona mwavuhulele Ezaya wale, eera:*

*“Nabwiya a Anyakoddo a Odhulu aheere ahinihiyedha
anamabaliwelamo neere obwanyuliwa
wona Soddoma ni Gomora.”ⁱ*

^e 9.18 Moone Okuma 4.21; 7.3; 9.12; 14.4,17 ^f 9.25 Ozeya 2.23 ^g 9.26 Ozeya 1.10

^h 9.27-28 Ezaya 10.22-23 ⁱ 9.29 Ezaya 1.9

Ezarayeli ni Muselu Wapama

³⁰Ki vevo niwoge ddi? Niwoge wi ale yahaali aZhudewu, yahasa-yela wiiriwa owogoowa, yahaanda wiiriwa owogoowa voororomela. ³¹Mbwenye aEzarayeli yasayela wiiriwa owogoowa voochara Mala-mulo, kayaakwanihile. ³²Mwaha bwaddi? Mwaha wi yasayela wiiriwa owogoowa mwa dhowiira dheewa, ehili mwa nrromelo. Mowindo yahikwakwathuwa vanibweni nookwakwathusa. ³³Wona mulebeliwiwa, yiira:

*“Keeng’anani, miyo ginohela muZiyoni,^j
nibwe nookwakwathusa,^k nibwe nddo nootongwiha,
ole onamuroromela oliye kadha akalana manyazo”.^l*

Ovulumusiwa wa aZhudewu

10 ¹Addibilaga, arogoraga, enarabuleliimi ni murima waaga waate-ne teto enamulobiimi Mulugu sowi aEzarayeli evulumusiwe. ²Ginowiirela onamoona wi ba nthakwithakwi voomuhara Mulugu, mbwenye kinewelelamo mukalelo wa ebaribari woomuharana. ³AZhudewu voohunona wogoowa onadha wa Mulugu, esayelaga wogoowa weewa-weewa, kayaroromele wogoowa onadha wa Mulugu. ⁴Vowi Kirixtu mwa oliye yeeka ohaakwaneliha Malamulo a Mozezi wi kadda muthu onamuroromela onowiiriwa owogoowa ni Mulugu.

Ovulumusa wowaakalela aatene

⁵Owoga dha wogoowa onadha vowiwelela Malamulo, Mozezi ahi-leba, wiira: *“Muthu oneerana dhedho, onoodha akale ni egumi odheela wa dhedho”*.^m ⁶Mbwenye wogoowa onadheela voororomela wiire: *“Ohukohe mmurimani mwaawo, wiira: ‘Onaagwele odhulu baani?’ ”*ⁿ (Ela sowi amudhena Kirixtu muddibani.) ⁷*“Naari ohukohe, wiira: ‘Onaakitele omuliddini ohinna omagomelo baani?’ ”*^o (Ela sowi amvenyihe Kirixtu muukwani.)^p ⁸Maleba Ootaleleya yiire avi? Yiire: *“Madhu a Mulugu eli vakukuve ni we, eli muwano mwaawo teto mmurimani mwaawo”*.^q Ala bi madhu a nrromelo enaalaleyiihu. ⁹Akala onosoriha ni vamulomoni vaawo wi Yesu di Nabwiya teto akala onororomela mmurimani mwaawo wi Mulugu ahimvenyiha muukwani, onoodha ovulumusiwe. ¹⁰Vowi ni

^j 9.33 Ziyoni naali ndina nimohi na Zheruzalemi. ^k 9.33 Naari wi: *Nibwe noovoreyiha.*

^l 9.33 Ezaya 8.14; 28.16 ^m 10.5 Levitiku 18.5 ⁿ 10.6 Deteronomiyo 30.12-14

^o 10.7 Deteronomiyo 30.12-14 ^p 10.7 Mulugu onawoga nda wi athu ehikohege dhookoha nda mwaha wi ohumurumiha ooromelihiwa Kirixtu. Vano Yesu Kirixtu oyo ohudhana wogoowa aZhudewu wasayeliwa. ^q 10.8 Deteronomiyo 30.12-14

murima muthu onororomela eera ndo onowaakela wogoowa, ni mulomo asoriha wi Yesu di Nabwiya aaye, ohuvulumusiwa. ¹¹Vowi Maleba yiire: *“Aatene enamuroromela oliye, kidha ekalana manyazo”*.^r ¹²Kavili ohiyana vaari va aZhudewu ni aGerego, vovi Nabwiya mmohive oyene dili Nabwiya a athu aatene, onowaareliha moofeewa madada aatene enamweebedha. ¹³Dhili wona madhu a Mulugu munawogeliwa, yiiraga: *“Kadda muthu onamweebedha Nabwiya onoodha avulumusiwe”*.^s

¹⁴Ki athu enamweebedha Mulugu addi akala kinamuroromela? Naari enamuroromele addi akala kineewe dha oliye? Eneewe dha oliye addi akala kavili oolaleya? ¹⁵Athu enaalaleye addi akala kavili owaaruma? Madhu a Mulugu yiire: *“Soohagalasa wawoona yaafiyaga oolaleya Muselu Wapama”*.^t

¹⁶Mbwenye kahuwo aatene yeewelee Muselu Wapama. Dhili wona Ezaya munawogeliye, eeraga: *“Nabwiya, aroromele dhalaleyihu baani?”*^u ¹⁷Mowindo, ororomela onadheela mwaha wowiwa mutheenga, wiiwa onadheela mwa madhu enawoga dha Kirixtu.

¹⁸Mbwenye ginokoha wi: *“Sowi aEzarayeli kayeewile?”* Ee, yahiiwa. Dhili wona madhu a Mulugu munawogeliwa, yiiraga: *“Ndhu neewa nahivuwa elabo yaatene ya vati, madhu eewa yahifiya omagomelo wa elabo”*.^v ¹⁹Ginokohave wi: *“Sowi aEzarayeli kayeewile?”* Vowambeela, Mozezi ahiwoga madhu a Mulugu, wiira: *“Ginoodha guukalihenaani nrima odheela athu ehili nlogo, guukalihenaani owali odheela nlogo na athu oohunonelamo”*.^w ²⁰Teto, ni murima wooliba, Ezaya ahiwoga madhu a Mulugu wa ale yahaali aEzarayeli, wiira: *“Yahigifwanya athu ayene yahagisayela. Gahiyooneyiha wa athu ayene yahagikohedhela”*.^x ²¹Mbwenye dha aEzarayeli, ahiira: *“Nlabo naatenene gahitapula madada aaga wi gaakele nlogo noohugiiwelela, nogiinyuwela”*.^y

Thagaraga dha Mulugu wa aEzarayeli

11 ¹Vano ginokoha, giiraga: *“Sowi Mulugu onowaakoodda athu aaye?”* Nivang'onong'ono! Miyeenene gili muEzarayeli, mwa anamabaliwelamo a Abarhamu, a nihimo na Benzhami. ²Mulugu kanaakoodda athu aaye, ayene yaasakuliye wale. Kamunonile wona namavuhulela Eliyazi vaasumeliye a aEzarayeli wa Mulugu wona munawogela Maleba Ootaleleya? Eliyazhi ahiira: ³*“Nabwiya, athu ala ehaapa anamavuhulela eenyu, ehibwanyula maburo eenyu a mukutho. Gihalile meenka teto enafuna egipe ni miyeene”*.^z ⁴Mulugu amwaakulile avi? Eere: *“Gihaaloglela alobwana macikwi matanu ni meenddi (7.000) ehikokori-*

^r 10.11 Ezaya 28.16 ^s 10.13 Zhoueli 2.32 ^t 10.15 Ezaya 52.7; Nahumi 1.15

^u 10.16 Ezaya 53.1 ^v 10.18 Masaalimu 19.4 ^w 10.19 Deteronomiyo 32.21 ^x 10.20 Ezaya 65.1 ^y 10.21 Ezaya 65.2 ^z 11.3 Mamwene Owambeela 19.10,14

le emweebedha Bahala, mulugu eebeweene”.^a ⁵Mwa mukalelo mmohive dhiinova teto ehihalawo aEzarayeli, ale Mulugu yaasakuliye mwa mahala aaye. ⁶Akala aasakulele mwaha wa mahala aaye, enatapulela wi kaasakulele mwaha wa dhowiira dheewa. Wahaakale mwaha wa dhowiira dheewa, mahala aaye kayaakale mahala a ebaribari.

⁷Ki niire ddi? AEzarayeli kayafwanyile dhasayeliisu. Mbwenye ayene Mulugu yaasakuliiye yahifwanya. Oohala ayo yahivaaddihiwa mirima, ⁸wona mulebeliwiwa, yiira: *“Mulugu ohaavaha muneba wootaduwa, meento owoona wi ehoonege, obaruni wowiwa wi ehiiwege. Dhili ndo ofiyedha peeno”.*^b

⁹Teto Davidi, wiire:

*“Mathanga eewa,
yaasadduwele eliba ni nddiwa nowaapida,
wi ehiddiwe erabulhiwe.*

¹⁰ *Meento eewa efugeye wi ehoonegeve,
teto mitana dheewa dhikale dhookoromana
mudhidhi dhaatedhene”.*^c

Ovulumusiwa wa athu a malogo mamohi

¹¹Vano ginokoha wi: “AEzarayeli yahikwakwathuwa wi emore kuluwi?” Nivang'onong'ono! Mbwenye mwaha wa othega weewa, ovulumusa ohaafiyedha athu ehili aEzarayeli wi aEzarayeli efiyedhe otatamuwa nrima. ¹²Akala othega weewa wahaapuriha athu a elabo ya vati teto akala olepela wa aEzarayeli wahaapuriha athu a malogo mamohi, mareeliho a Mulugu enomwadheyela wa aEzarayeli yawelela wa oliye.

¹³Dhiinova ginawoga ni nyo muhuli aEzarayeli. Ndala wona giliimi murumiwi wa ale ehili aEzarayeli, ginovuwiha mabasa aaga ala, ¹⁴moojijhedha wi mwa mukalelo mmohi, gaatatamule nrima athu a nlogo naaga ni waavulumusa amohi mwa aliwa. ¹⁵Akala okoooddiwa wa aEzarayeli ni Mulugu ohudhiiha murenddele vaari va oliye ni athu a elabo ela, moohaanganyedha orumeedhiwa wa aEzarayeli oneere odhana egumi, ohuli okwa.

¹⁶Akala epaddi yowambeela ya mukaathe enakala yoweela, mukaathe waatene onakala woweela. Teto musisi wa muthanko wakala woweela enatapulela wi ni mijindda dhene soweela.^d ¹⁷Akala mijindda dhimohi dha olivera oodhaliwa dhiire ogwaddiwa, vano we ogali mujindda wa olivera a mukokolani wiire obandihedhiwa ni muthanko dhoodhaliwa,

^a 11.4 Mamwene Owambeela 19.18 ^b 11.8 Deteronomiyo 29.4; Ezaya 29.10

^c 11.9-10 Masaalimu 69.22-23; 35.8 ^d 11.16 Moone Numero 15.17-21

weedelaga orongonyedha onadheela mmisisini dha olivera oodhaliwa ola, ¹⁸vano kunyemule mijindda dhigwaddiwe. Mbwenye weethukulelaga, wuubuwelelege wi kahuwo we onavaha egumi misisi, mbwenye misisi ndo sinoovaha egumi. ¹⁹Vano onoodha wiire: “Mijindda dhimohi dhahigwaddiwa wi gibandihedhiwevo”. ²⁰Ebaribari, aliwa ehigwaddiwa mwaha wi kayaroromele, vano we, voororomela, onakala mmuthankoni dhiinova. Mowindo kawiithukulege mbwenye woovege, ²¹vowi Mulugu kaahiyedhedhe aEzarayeli, ayene eli wona mijindda dha ebaribari dha muthanko. Ki vano, onobuwelela wi onoodha oohiyedhedhe we?

²²Odidele wi Mulugu da thagaraga, mbwenye teto odidele wi do-wumma murima: Dowumma murima wa ale etongwile, mbwenye da thagaraga ni we, wakalave mwa thagaraga dhaaye. Akala kuneerena dhedho teto onoodha ogwaddiwe. ²³Teto ni aliweene onoodha aabandihedhe vamuthankoni, yahikalave moohuroromela mweewa. Vowi Mulugu dakopolo, onowaanda waabandihedha dila biili. ²⁴We wiire ogwaddiwa va olivera a musawo wa mukokolani, vano mwa mukalelo woohiyana ohubandihedhiwa va olivera oodhaliwa. Mowindo kadhinakala dhookweya obandihedha va olivera mijindda nde dhili dhaaye-dhaaye?

Thagaraga dha Mulugu wa athu aatene

²⁵Nyo addibilaga, arogoraga ginafuna wi munone ya wipiini ela wi mwihithukulelege muubuwelelaga wi muli oononelamo. Yawipiini eyo, si ela: aEzarayeli ajinji yahivaaddihiwa mirima ofiyedha waakwanela ovulumusiwa wa ale Mulugu yaasakuliye vaari va ale ehili aEzarayeli. ²⁶Mowindo athu aatene a Mulugu, athu ayo eneethaniwa “Ezarayeli”, enoodha evulumusiwe. Wona Maleba munawogeliwa, yiiraga:

“Onaakumele oZiyoni^e Namooobola.

Onoodha avenyihevo ohumuriha Mulugu waatewene wa anamabaliwelamo a Yakobo.

²⁷ *Ndda thi nipangano naaga ginadhiimi giirena ni aliwa gavenyihavo dhoothega dheewa”.^f*

²⁸Mwaha wa okoodda Muselu Wapama, aEzarayeli ehisadduwa okala amwiiddani a Mulugu wi nyo mpurevo. Mbwenye mwaha woosakuliwa, aliwa ba odhivela aaye mwaha wa abaabi eewa Abarahamu, Ezaaki ni Yakobo. ²⁹Vowi mvahi ni wiithana wa Mulugu kadhinasadduwa. ³⁰Mwa mukalelo mmohive mundduli nyo mwaali oohumwiiwelela Mulugu mbwenye dhiinova muhaakela thagaraga mwaha wa ohiiwelela weewa,

^e 11.26 Ziyoni naali ndina nimohi na Zheruzalemi. ^f 11.26-27 Ezaya 59.20-21; 27.9; Zheremiya 31.33-34

³¹dhili ndo ni aliwa. Aliwa yaali oohiiwelela wi odheela wa thagaraga Mulugu dhuwoonihiliyi, aliwa teto eneere yaakele thagaraga. ³²Mulugu ahawiira athu aatene wona anyakaambura a ohiwelela wi aweeddiwele thagaraga aatene.

Jibo yoomuthithimiha Mulugu

³³Dhooreela, tthottho ni ononelamo wa Mulugu si dhuulubale mookwaranya! Onatapulela dhoothonga dhaaye baani? Onewelelamo dhowiira dhaaye baani? ³⁴Maleba Ootaleleya yiire:

*“Anonile moobuwelelo a Nabwiya baani?
Aali namalaga aaye baani?”^g*

³⁵Teto Maleba yiire:

*“Onamvahaga yego Nabwiya
wi afwanele owelihedhiwa baani?”^h*

³⁶Dhaatedhene dhinadheela wa oliye, dhinokalawoove ni oliye teto dhinamukalelawa oliye. Wa oliye okale nthithimiho okala ni okala. Ameni!

Egumi exa ya eKirixtu

12 ¹Mowindo, addibilaga, arogoraga, ginowuukokomezani odheela thagaraga dha Mulugu wi mwiipeleke wona mukutho wa egumi, woweela, woomudhivela Mulugu. Oyene bu mukalelo weenyu wa ebaribari womweebedha mwa muneba. ²Kamutajihe makalelo a athu a vati vano, mbwenye mukale oosadduliwa odheela osadduliwa wa moobuwelelo eenyu wi odheela mooxixa munosuza ofuna wa Mulugu oli opama, odhivela, waakwanela.

³Odheela mahala givahiwiimi ginowuwaaddelani kadda muthu a mwa nyo wi mwiihiyirege ookwaranya mwemo mukaleliinyu. Moohiyaniha, muubuwelege moofwanafwana ni ebaribari, mooligana ni wunnuwa wa nrromelo Mulugu nimvahiliye kadda muthu a mwa nyo. ⁴Mmwiilini mweehu nihikalana yaano dhijinji, yaano nda dhinolaba moohiyanihiyana. ⁵Emodha-modhave hiyo nnarromela naari nigalive ajinji nili mwiili mmohive mwa Kirixtu, kadda muthu doomagelelana ni amohi. ⁶Nihikalana mvahi dhoohiyanihiyana mooligana munivahela Mulugu mwa owoma murima waaye. Akalavo winna mvahi woovuwiha mutheenga wa Mulugu, avuwihege mooligana ni nrromelo naaye. ⁷Akalavo winna mvahi wowiimelela, eemelelege. Akalavo winna mvahi woosuuzi, asuuzihege. ⁸Akala mvahi woolibiha, alibihege. Akala mvahi

^g 11.34 Ezaya 40.13 ^h 11.35 Zhobu 41.11

woovaha, avachege ni madada oofewa. Ole oli musogoleli, eevelelege mmabasani aaye. Ole winna mvahi wowooniha thagaraga, oonihege moohagalala.

Dhoofuneya mwiigumini ya eKirixtu

⁹Odhivela okalege wa ebaribari. Mwiiddanege ni dhabure; muku-baarelege dhapama. ¹⁰Mudhivelanege mwa ebaribari wona addibila, mwiilibihedhe wi moonihege nriho mmohi ni mukwaaye okwaranya we vaweeka. ¹¹Mwiivelelege moohugoma, mukalege oopaha mwa muneba, mmwiimelelege Nabwiya. ¹²Muhagalalege ni ojejihedha weenyu. Mvilele-ge vaari va orabula, mulobelege mudhidhi dhaatedhene. ¹³Mugawanege dhinniinyuna ni oweela mirima eli oorabula. Mwawiithanelege aleddo mmavade mweenyu.

¹⁴Mwaareelihege ayene enooharharani; mwaareelihege, kamwaaddu-bege. ¹⁵Muhagalalege ni ale enahagalala, muunddege ni ale enaanda. ¹⁶Mwiiwananege pama teto kamwiithukulelege, mbwenye mwaanda-nege ni athu bure. Kamwiyirege wona atthotho. ¹⁷Muthu owiirelani yootakala, kammuwelihedhe yootakala. Xixani wiirana dhedho athu aatene dhinooniwa wi sapama. ¹⁸Mwiilibihedhege wi mukalege mmu-renddeleni ni athu aatene, dhakala dhowaandeya. ¹⁹Oodhivela aaga, kamuwelihedhege yootakala, mbwenye mwihye owali wa Mulugu olabe. Vowi dhihilebiwa wi: *“Nabwiya wiire: ‘Wuundda kunyawunya fwaaga, onadhe aawelihedhe di miyo’ ”.*ⁱ ²⁰Moohiyaniha, wona munawogela madhu a Mulugu: *“Akala mwiiddani aawo ohukalana dala, omvahe yooja. Akala ohukalana nthona, omvahe yoong’wa. Weera ndo, onamuugelela makala a munddo vamuru vaaye”.*^j ²¹Kamugonjihiwe ni dhootakala, mbwenye mugonjihe dhootakala voviirana dhapama.

Mwawiiwelelege anamalamula

13 ¹Athu aatene yawiiwelelege apogo enalamulela elabo, mwaha wi kavili oolamula ohukumele wa Mulugu. Teto oolamula eliwo ekaraatihiwe ni Mulugu. ²Mowindo muthu onakoodda wawiiwelela oolamula, onakoodda nde Mulugu dhikaraatihiliye. Ayene enakoodda enowaakela othongiwa. ³Anamalamula kinooviwa ni athu a meere-lo apama, mbwenye enooviwa ni athu a meerele ootakala. We onofuna wi ohumoovege oolamula? Wiiregena opama, ndo oneere otamaaleli-wa. ⁴Vowi namalamula di mwiimeleli a Mulugu mwa opama waawo. Mbwenye akala onowiirana dhootakala woove, vowi ohukalana supaadda wi oorabulihena. Oliye di mwiimeleli a Mulugu, namaandda kunyawunya wi adhena owali wa Mulugu wa ale eneeranaave dhootakala. ⁵Mowindo

ⁱ 12.19 Deteronomiyo 32.35 ^j 12.20 Poroveribiyo 25.21-22

mwawiiwelelege anamalamula, ohuli mwahave wa owali wa Mulugu, mbwenye teto mwaha wowiiwelela onamoona wa mmurimani.

⁶Mwahaya buuyene munaliveliinyu musoko, vovi anamalamula amwiimeleli a Mulugu wi ekamihedhege mulogo, yiimelelagave malabweene mabasa ala. ⁷Vano mpelekege wa aatene dhedho dhinafwanelela: Akala musoko, mulive musoko; akala dhoosokela, musokele; akala oriha, murihege; akala othithimiha, muthithimihege.

Waadhivela amwaaddamani

⁸Kamukalegena mangawa ni athu, ehili mangawa oodhivelana ni athu aatene. Vovi onamudhivela mwaaddamani onoharihamo Malamulo a Mulugu maatene. ⁹Vovi Malamulo eneera: “*Kuraruwe, kupe, kawiiye, kukalele nrima*”, malamulo ala ni mamohi maatene enamorela munlamuloni ndda, nneera: “*Waadhivelege amwaaddamani wona muneedhiveliwe wamwiinya*”.^k ¹⁰Odhivela kunamwiirela mwaaddamani yootakala, mowindo odhivela fuwaakwaneliha wa Malamulo.

Nlabo na Nabwiya nihaaddamela

¹¹Mwiirena dhaatedhene dhedho mwaha wi muhunona mudhidhi ola, ehifiya wora wi mvenyihiwe mukoveni. Vovi ovulumusiwa weehu oli vakukuuve okwaranya vambeelihi ororomela. ¹²Mahiyu ehivira, osa ohaaddamela. Vano kabeni nihiye meerelo a muyiihini, nithukule yeela dhoowanana wi niwanena mowaara. ¹³Meeddelo eehu ekale oofwanelelelona wa athu oweedda mutana. Nihiye mathanga abure, olezela, ojeberuwe, oraruwa, okangana, nihidda. ¹⁴Vano mmuware Nabwiya Yesu Kirixtu. Muhuubuwelelege ohagalaliha dhikwaminigwa dheenyu dhootakala.

Kammukone muthu

14 ¹Mwaakeleni pama muthu winna nrromelo noolodhowa, ehili ni efunelo yowi mukooddege moobuwelelo aaye. ²Mmohi onaromela wi yooja eli yaatene soojiwa. Mbwenye mmohi winna nrromelo noolodhowa, onaja dhoohukalana mwazi baahi. ³Oyene onaja dhaatedhene kamvevuse ole ohunaja. Ole ohunaja dhaatedhene kamukone ole onaja, vovi Mulugu ohumwaakela. ⁴Ki we oli aani wi omukone mwiimeleli a mwiinya? Nabwiya aaye yeeka difwanelele omuthonga akala oliye ohiiwelele naari keewelege va mabasa aaye. Ee, onoodha eewelege, vovi Nabwiya eehu onowaanda omulibiha.

⁵Mmohi onoobuwela wi nlabo nangana thookwaranya malabo mamohiwa, mbwenye mmohi onoobuwela wi malabo maatene enooligana.

^k 13.9 Levitiku 19.18

Kadda muthu aharege ebaribari eli mmurimani mwaaye. ⁶Oyene onaloglela nlabo nangana, oneera ndo wi amuriihe Nabwiya. Ole onaja eli yaatene, oneera ndo wi amuriihe Nabwiya, vowi onamutthetheela Mulugu mwaha wa yooja eyo. Ole ohunaja dhaatedhene teto oneera wi amuriihe Nabwiya, oliye onamutthetheela Mulugu. ⁷Mwaha wi kavili naari mmohi mwa hiyo oyene onakala ni egumi mwaha wa oliye yeeka, naari okwa wa oliye yeeka. ⁸Nakala agumi, nnamukalelawo Nabwiya; nakwa, nnakwa mwa Nabwiya. Ndala, naari nikale agumi naari nikwe, nili a Nabwiya. ⁹Kirixtu ahikwa, ovenyihwa muukwani wi akale Nabwiya a athu ookwa ni ookalawo.

¹⁰Ki vano we, onamukonela ddi mmudhi aawo mwa Kirixtu? Naari we, onamunyemulela ddi mmudhi aawo? Vowi hiyo aatene nnoodha nikale vameentoni va Mulugu wi nithongiwe. ¹¹Dhilihilebiwa mMalebani Ootaleleya, yiiraga:

*“Nabwiya wiire: ‘Ginowiilibela miyeenene,
makuta a athu aatene, enoodha ekokore vameentoni vaaga,
milomo dhaatedhene, dhinoodha dhisorihege wi gili Mulugu’ ”.*¹

¹²Mowindo kadda muthu vaari va hiyo onoodha aakulelege yeeka wa Mulugu dhaatedhene dheeriliye.

Kumuthegihe mmudhi aawo muKirixtu

¹³Mowindo ndoweni nihiyeni okonana mmohi ni mukwaaye. Moohiyaniha, kadda muthu alibelele ohiirana yego yowaakwakwathusana aKirixtu amohi, naari waaholosa. ¹⁴Ngali mwa Nabwiya Yesu, miyo gihinona gihaanganyedhaga wi kavili yooja enamutakaliha muthu aja. Mbwenye akala mmohi onoobuwela wi enomutakaliha, ee, wa oliye enomutakaliha. ¹⁵Akala mmudhi aawo onokukumuwa mwaha wa eyene enajiiwe, enatapulela wi vano kuneedda moodhivela. Kumunoonge ni yooja yaawo, muthu oyene Kirixtu omukweliye. ¹⁶Kamurumedhege wi athu amohi yeelengelege wi sootakala dhego dhedho dhinooniinyu wi sapama. ¹⁷Mu Omwene wa Mulugu yuulubale kahuwo yooja naari dhoong'wa, yuulubale fuwogoowa, murenddele ni ohagalala dhina-dheela mwa Muneba Woweela. ¹⁸Mwa mukalelo olena kadda muthu onamwiimelela Kirixtu onomuhagalaliha Mulugu teto onakala oorumeedheya wa athu.

¹⁹Mowindo nisayelege dhego dhinadhiiha murenddele ni dhego dhinamikamihedha onilibiha mmohi ni mukwaaye. ²⁰Kunoonge mabasa a Mulugu mwaha wa yooja. Yooja yaatene soorumeedhihiwa mbwenye

¹ 14.11 Ezaya 45.23; 49.18

enakala yoothega oja yego enaakwakwathusa akwiihu. ²¹Sapama ohuja nyama, ohumung'wa vinyu, naari wiirana yego eli yaatene enamukwakwathusa mmudhi aawo. ²²Dhedho dhinaroromeliwe dhikale vaari va we ni Mulugu baahi. Dooreelihiwa oyene murima waaye ohunamukona mwaha wa dhedho dhinarumeedhiye. ²³Mbwenye muthu onaja aanga-nyedhaga ohuthega, vowi dhedho dhineeriyiye sohiivanana ni dhedho oliye dhinaroromeliye. Vowi eli yaatene eyene muthu eneeriye yoorunihana ni dhedho oliye dhinaroromeliye, yoothega.

Mwaahagalalihege akwiinyu

15 ¹Hiyo ninna nrromelo nakopolo nivilelegena dhoolodhowa dha ale eli oolodhowa, nihihagalalihege weekiihu. ²Kadda muthu vaari va hiyo amuhagalalihege mukwaaye mwa opama waaye wi amulibihe munroromeloni. ³Naari Kirixtu keehagalalihe va yeeka, mbwenye wona Maleba munawogeliwa, yiiraga: *“Dhooruwana dha ale yooruwana dhihimorela wa miyo”.*^m ⁴Dhaatedhene dhilebiwe wale dhalebiwe wi dhinisuuze wi nikanne ejijhedho. Ojejihedha wo onadha moovilela ni olibihiwa Maleba Ootaleleya onanivahiwa. ⁵Mulugu onaavaha ovilela ni oliba murima oovaheni wiiwanana mmohi ni mukwaaye, moohariha meeddelo a Yesu Kirixtu, ⁶wi ni murima mmohi, mwaatene muumohini mmuthithimihege Mulugu, Baabi a Nabwiya eehu Yesu Kirixtu. ⁷Mowindo mwaakelanega mmohi ni mukwaaye wona Kirixtu mowaakeleliiyeni wi Mulugu athithimihiwege.

Kirixtu waadheele athu aatene

⁸Miyo ginowuwaaddelani wi Kirixtu ahisadduwa okala mwiimeleli a aZhudewu wi oonihe dhowi Mulugu doororomeleya wa dhoororomeliha dheeriliye wa makolo eewa awale, ⁹teto wi ayene ehili aZhudewu emuthithimihege Mulugu mwaha wa thagaraga dhaaye. Wona mulebeliwiwa Maleba Ootaleleya, yiiraga:

*“Ndala ginoodha guutamaaleni vaari va ale ehili aZhudewu, ginoodha giibe jibo dhootamaalela, ndina neenyu”.*ⁿ

¹⁰Teto yiire:

“Nyo, muhuli aZhudewu, agalalani vamohi ni nlogo na Mulugu”.^o

¹¹Teto yiire:

^m 15.3 Masaalimu 69.9 ⁿ 15.9 Samuweli a Nabili 22.50; Masaalimu 18.49
^o 15.10 Deteronomiyo 32.43

*“Nyo mwaatene muhuli aZhudewu,
mmutamaalele Nabwiya,
athu a malogo maatene emweebedhe”.^p*

¹²Teto namavuhulela Ezaya wiire:

*“Mmohi mwa anamabaliwelamo a Zhesi onoodha,
oyene onaavenye wi aalamulele ale ehili aZhudewu.
Aliwa eneere ohela ejjihedho va oliye”.^q*

¹³Mulugu onanivaha ejjihedho adhaalihe mmirimani mweenyu ohagalala ni murenddele muwari mwa nrromelo neenyu ni oliye wi ojehedha weenyu wunnuwegeve ni owodha wa Muneba Woweela.

Kaarata ni mabasa a Pawulo

¹⁴Addibilaga, arogoraga, miyo gamwiinya kaginaanganyedha wi nyoovo teto muli athu oodhaaliwa owoma murima, muli athu oodhaaliwa onone-lamo teto owaanda osuuzihana mmohi ni mukwaaye. ¹⁵Mbwenye kaarata ela guulebeleni moohoova wi guwuubusedheni dhego dhimohi dhinoniliinyu. Guhuulebelani moohoova mwaha wa mahala ookala murumiwi Mulugu ogivahiliye, ¹⁶wi gikale mwiimeleli a Yesu Kirixtu ni wa athu ehili aZhudewu. Ahigisakula wi gisuuzihege Muselu Wapama wa Mulugu wi athu ayo ekale wona mikutho dhoomudhivela oliye, dhooweelihiwa ni Muneba Woweela. ¹⁷Mowindo ginowiithukula mwaha wa nde dhinamwiireliimi Mulugu odheela mwa Yesu Kirixtu. ¹⁸Kaginaliba murima owoga dha yego emohi, eehi, dhihili nde dhandiliimi odheela mwa Kirixtu wi gaakamihedhe ale ehili aZhudewu omwiwelela Mulugu. Gihaanda nda odheela dhiwogiliimi, dhiiriliimi, ¹⁹odheela dhitoonyihedho ni dhootikiniha dha kopolo dhowiireya ni kopolo dha Muneba Woweela. Mowindo gihilaleya dhipaddi dhaatedhene, Muselu Wapama onawoga dha Kirixtu wambeela oZheruzalemi ni elabo yowaapelela ofiyedha olliriko. ²⁰Dhoofuna dhaaga soolaleya Muselu Wapama mumburoni muhuneewiwe ewogaga dha Kirixtu wi gihimage vamatibelelo yambeeliwe ni muthu mmohi. ²¹Wona mulebeliwiiwa Maleba Ootaleya, yiraga:

*“Athu ayene yahaaddeliwe dha oliye, enoodha yoone,
ayene yaheewile dha oliye, enoodha yiiwelelemo”.^r*

Pawulo onoobuwela odhowa oRoma

²²Mwaha wa dhoofuna dhaaga nde kagaandile ofiya wa nyo.

²³Mbwenye vano kagina mburo woolaleya epaddi ya wuno teto

wambeela wale goorabulela odha wa nyo, ²⁴mowindala ginajejihedha odha wuwoonani mudhidhi onaavirigiimi gaadhowaga oXipaanya. Ginoodha gihagalale wuwaaredhelani malabo mangaasi. Vooharela ginafuna mugikamihedhe wi giwelele olenndo waaga. ²⁵Mbwenye dhiinova ginadhowa oZheruzalemi gapeleke nikamihedho na aKirixtu a wewo. ²⁶Wovi gerezha dha oMasedoniya ni dha oAkaya dhahihagalala oveleela dhowaakamihedhana athu oorabula a Mulugu a oZheruzalemi. ²⁷Yahihagalala wiirana ndo, ee, yaali mangawa eewa waakamihedha aliwa. Wovi aZhudewu yahaagawana mareliho a Mulugu ni aliwa, ndo aliwa yahifwanelela wawiimelela ni ogawana dhookalana dheewa ni aZhudewu. ²⁸Vano ngamarihile dhoovelela ndo gipelekela pamadhene oZheruzalemi, ginoodha givirele owaninyuwo gaadhowaga oXipaanya. ²⁹Gihinona wi gadha wewo, ginadha gigadhaaliwe ni mareliho a Kirixtu.

³⁰Amudhaaga, ginowuulobani odheela mwa Nabwiya eehu Yesu Kirixtu teto odheela odhivela wewo Muneba Woweela onanivahiye wi mwiiwanane ni miyo mulibihedhaga ogilobelela vameentoni va Mulugu. ³¹Mugilobebelege wi gihimorele mmadani mwa athu oohuroromela a oZhudeya. Mulobele wi athu a Mulugu a oZheruzalemi yaakele ni mada da meenddi dhoovelela dhinaapelekiimi. ³²Dheereya ndo, ginoodha gifiyeni ohagalala owaninyu wo odheela ofuna wa Mulugu, ginoodha givume ni nyo. ³³Mulugu onavaha murenddele akale ni nyo mwaatene. Ameni.

Malojelo oogomihedha

16 ¹Ginomvelelela mmadani mweenyu, murogora eehu Febe, oyene oli mwimeleli a gerezha ya oSenkereya. ²Mwaakeleni mu ndina na Nabwiya wona athu a Mulugu munafwaneleliiwa. Mmukamihedhe wona murabuleliye nikamihedho neenyu. Wovi ahaakamihedha athu ajinji teto nimiyeene.

³Mmulojele Pirisila ni Akwila, anamalaba akwaaga mwa Yesu Kirixtu. ⁴Ala yahivelelela makohi eewa mowoopiha wi evulumuse egumi yaaga. Ndo ginowaatthetheela, kahuwo miyeeneve meenka ginaatthetheela, mbwenye teto gerezha dhaatedhene dha ale ehili aZhudewu. ⁵Mulojele teto gerezha enatugumana mba mweewa.

Mmulojele oodhivela aaga, Epeneto, oli yoovaha yowambeela ya Kirixtu oAziya. ⁶Mmulojele Mariya, oyene ohiddile mabasa moolibihedha wa nyo. ⁷Mwaalojele Adoroniku ni Zhuniya, aZhudewu wona miyo, yaali mukaambura ni miyo. Aliwa boovuwa vaari va arumiwi, bambeele okala mwa Kirixtu, miyo gihinakale.

⁸Mmulojele Ampiliyato, oodhivela aaga mwa Nabwiya. ⁹Mmulojele Urubanu, namalaba mukwiihu va mabasa a Kirixtu teto wa Extaki, oyene onamudhiveliimi. ¹⁰Mmulojele Apele, oorumeedhiwa mwa Kirixtu.

Mwaalojele a murala wa Arixto bulu. ¹¹ Mmulojele Heroddiyawu, mu-Zhudewu wona miyo. Mwaalojele aKirixtu eli vamuralani va Narisizu.

¹² Mwaalojele Tirifena ni Tirifosa, ayene enahidda mabasa a Nabwiya. Mmulojele Periside, oodhivela ole ahiddile mabasa vajinji a Nabwiya. ¹³ Mmulojele Rufu, osakuleliwe Nabwiya teto mma aaye oyene oli wona mma aaga. ¹⁴ Mwaalojele Asinkiritu, Felegonte, Hereme, Patoroba, Herima ni aKirixtu eli ni aliwa. ¹⁵ Mwaalojele Filologu, Zhuliya, Nerewu ni murogoriye ni Olimpa ni oweela mirima aatene eli ni aliwa. ¹⁶ Muloje-lane mmohi ni mukwaaye ni bezhu ya odhivelana wa eKirixtu. Gerezha dhaatedhene dha Kirixtu dha wuno dhinowuulojelani.

Magano oomariha

¹⁷ Addibilaga, arogoraga, ginowuukokomezani mwiyiing'anele ni athu enatata muma ogawanyeya ebarelaga masuuziho musuuziliinyu. Athu ayo mwaarabelege, ¹⁸ vovi athu owindo kinamwiimelela Kirixtu, Nabwiya eehu, mbwenye eneemelela dhigulu dheewa baahi. Ni madhu ooriya ni ootamaala enonyengetha mirima dha athu oohunonelamo. ¹⁹ Athu aatene yahiiwa dhowiwelela weenyu, mowindo miyo ginohagalala mwaha wa nyo. Vano ginafuna wi mukale oononelamo dhili dhapama ni ohukanna muladdo mwa dhego dhootakala. ²⁰ Dhiinoveva Mulugu onavaha murenddele onoodha ambwanyule Sathana vati va manyalo eenyu.

Nabwiya eehu Yesu Kirixtu oovaheni mahala.

²¹ Timoteyo onalaba ni miyo wuno, onowuulojelani. Teto Lusiyu, Zhasoni ni Sosipatere, aZhudewu wona miyo, enowuulojelani. ²² Miyo Teresiyu, namaleba a kaarata ya Pawulo ela, ginowuulojelani mwa Nabwiya. ²³ Gayu onowuulojelani, oliye dinagikameela teto onokameela gerezha yaatene eli vaade vaaye. Eraaxtu, namalogolela a dhooreela dha nluwa, teto Kwaarutu, ddibilihi, enowuulojelani.

²⁴ [Nabwiya eehu Yesu Kirixtu oovaheni mahala mwaatene. Ameni.]^s

Mulugu athithimihiwe

²⁵ Nimuthithimihege Mulugu! Oliye onowaanda onilibiha odheela Muselu Wapama onalaleyiimi, ole onawoga dha Yesu Kirixtu. Muselu ola si ebaribari yaali yawipiini wale-wale. ²⁶ Mbwenye dhiinova ebaribari ela ehivuhuleliwa odheela dhalebile anamavuhulela teto mwa olamula wa Mulugu amukala-kala, dhihifiyedha ononiwa ni athu aatene ehili aZhudewu wi eroromelege yiiwelelege.

²⁷ Mulugu yeeka oli atthotho akale oothithimihiwa mwa Yesu Kirixtu okala ni okala! Ameni.

^s 16.24 Madhu ala kinafwanyeya mmaniivuruni awale.